

---

**IS-BWYLLGOR LLES ECONOMAIDD CBC Y GOGLEDD**  
**16/05/2025**

---

**Yn bresennol:**

**Aelodau â Phleidlais** - Y Cynghorwyr:- Gary Pritchard (Cyngor Sir Ynys Môn), Menna Trenholme (Cyngor Gwynedd), Charlie McCoubrey (Cyngor Bwrdeistref Sirol Conwy), Dave Hughes (Cyngor Sir y Fflint), Jason McLellan (Cyngor Sir Ddinbych) a Mark Pritchard (Cyngor Bwrdeistref Sirol Wrecsam).

**Aelodau Cyfetholedig (Heb Bleidlais)** – Paul Spencer (Prifysgol Bangor), Yr Athro Joe Yates (Prifysgol Wrecsam) a Gwenllian Roberts (Grŵp Llandrillo Menai).

**Prif Swyddogion** – Dylan Williams (Cyngor Sir Ynys Môn), Sioned Williams (Cyngor Gwynedd), Rhun ap Iareth (Cyngor Bwrdeistref Sirol Conwy), Neal Cockerton (Cyngor Sir y Fflint) ac Alwyn Jones (Cyngor Bwrdeistref Sirol Wrecsam).

**Awdurdod Lletya** – Iwan Evans (Swyddog Monitro), Dewi Morgan (Swyddog Cyllid Statudol), Sara Jane Jones (Uwch Gyfrifydd) a Rhodri Jones (Swyddog Gwasanaethau Democratiaeth).

**Uchelgais Gogledd Cymru** - Alwen Williams (Prif Weithredwr dros dro Cyd-bwyllgor Corfforedig y Gogledd), Hedd Vaughan-Evans (Pennaeth Gweithrediadau), David Mathews (Rheolwr Rhaglen Tir ac Eiddo), Meghan Davies (Rheolwr Rhaglen Ynni a Sero Net), Sandra Sharp (Rheolwr Prosiect Ynni a Sero Net) a Nia Medi Williams (Uwch Swyddog Gweithredol).

**Eraill yn bresennol:**

Eitem 9            Andrew Hudson (Cyfarwyddwr, Zip World) a Lucy Dean (QUAD Consultancy)

**1. YMDDIHEURIADAU**

Derbyniwyd ymddiheuriadau gan:-

- Y Cyngorydd Nia Jeffreys (Cyngor Gwynedd) gyda'r Cyngorydd Menna Trenholme yn dirprwyo.
- Dafydd Gibbard (Cyngor Gwynedd) gyda Sioned Williams yn dirprwyo.
- Graham Boase (Cyngor Sir Ddinbych)
- Aled Jones-Griffith (Grŵp Llandrillo Menai) gyda Gwenllian Roberts yn dirprwyo.
- Yana Williams (Coleg Cambria).
- Eiliw Hughes (Rheolwr Rhaglen Cynllun Twf).
- Sian Pugh (Pennaeth Cyllid Cynorthwyol).

**2. DATGAN BUDDIANT PERSONOL**

Ni dderbyniwyd unrhyw ddatganiad o fuddiant personol.

**3. MATERION BRYD**

Ni chodwyd unrhyw faterion brys.

**4. COFNODION Y CYFARFOD BLAENOROL**

Llofnododd y Cadeirydd gofnodion y cyfarfod blaenorol a gynhaliwyd ar 11 Ebrill 2025 fel rhai cywir.

## **5. CYFETHOL I'R IS-BWYLLGOR LLE ECONOMAIDD**

Cyflwynwyd yr adroddiad gan y Swyddog Monitro.

### **PENDERFYNIAD**

- 1. Cyfethol Aelod o Awdurdod Parc Cenedlaethol Eryri (heb bleidlais) ar yr Is-bwyllgor Lles Economaidd i gefnogi ei swyddogaethau a'i gyfrifoldebau.**
- 2. Bod yr aelod isod o Awdurdod Parc Cenedlaethol Eryri yn cael eu cyfethol i'r Is-bwyllgor Lles Economaidd yn berthnasol i faterion cynllunio strategol yn unig:**
  - Cyng. Edgar W. Owen, Cadeirydd Awdurdod Parc Cenedlaethol Eryri**

### **RHESYMAU DROS Y PENDERFYNIAD**

Ar Fawrth 21 cytunodd Cyd-bwyllgor Corfforedig y Gogledd y bydd aelodaeth yr Is-bwyllgor Lles Economaidd yn cynnwys chwe Aelod Cyngor Cyd-bwyllgor Corfforaethol y Gogledd, ynghyd a chynrychiolydd o bob un o'r cyrff hynny a gynrychiolwyd ar Fwrdd Uchelgais Economaidd Gogledd Cymru, i gael ei benodi fel aelodau cyfethol dibleidlais.

### **TRAFODAETH**

Atgoffwyd bod y penderfyniad o gyfethol Aelod o Awdurdod Parc Cenedlaethol Eryri wedi cael ei ohirio yn ystod cyfarfod yr Is-bwyllgor hwn a gynhaliwyd ar 11 Ebrill 2025 er mwyn gwirio materion technegol. Mynegwyd balchder bod y materion hynny bellach wedi cael eu datrys. Cadarnhawyd bod y Cynghorydd Edgar Owen wedi cael ei enwebu i fod yn Aelod Cyfethol (heb bleidlais) o'r Is-bwyllgor hwn. Ymhelaethwyd bydd trefniadau Cyfethol yn cael eu cadarnhau gan y Swyddog Monitro os byddai'r Aelodau yn cadarnhau'r enwebiad hwn.

## **6. SEFYLLFA ALLDRO REFENIW A CHYFALF BUEGC AR GYFER 2024/25**

Cyflwynwyd yr adroddiad gan y Swyddog Cyllid Statudol.

### **PENDERFYNWYD**

- 1. Nodi adroddiad alldro y BUEGC ar gyfer 2024/25 sy'n cynnwys defnyddio £714,395 o grant Cynllun Twf Gogledd Cymru i ddangos sefyllfa niwtral ar gyfer y flwyddyn.**
- 2. Nodi sefyllfa cronfeydd BUEGC.**
- 3. Nodi adolygiad cyfalaf diwedd blwyddyn BUEGC ar 31 Mawrth 2025.**

### **RHESYMAU DROS Y PENDERFYNIAD**

Hysbysu'r Is-bwyllgor Lles Economaidd am sefyllfa ariannol y BUEGC ar gyfer refeniw a chyfalaf yn 2024/25.

Trosglwyddwyd rôl a swyddogaeth y BUEGC i'r CBC ar 1 Ebrill 2025, a oedd yn cynnwys staff, adnoddau, ymrwymadau ac asedau ariannol, gan gynnwys y Cynllun Twf a'r cyllid.

### **TRAFODAETH**

Cyflwynwyd yr Adroddiad er gwybodaeth i'r Is-bwyllgor gan gadarnhau y byddai'n cael ei gyflwyno i'r Cyd-bwyllgor Corfforedig yn ei gyfarfod ar 13 Mehefin 2025 er cymeradwyaeth.

Adroddwyd bod sefyllfa refeniw alldro terfynol ar gyfer y flwyddyn 2024/25 yn danwariant oddeutu £386,000. Eglurwyd bod y tanwariant hwn yn gynydd o'r tanwariant a ragwelwyd wrth adrodd ar y sefyllfa ym mis Rhagfyr 2024, sef oddeutu £205,000. Manylwyd ar brif pennawdau'r gyllideb fel a ganlyn:

- **Swyddfa Rheoli Portffolio** - Eglurwyd mai'r tanwariant net terfynol ar y pennawd hwn yw £75,140 yn sgil tanwariant ar wariant gweithwyr. Ymhelaethwyd bod chwyddiant cyflog gwirioneddol 2024/25 yn 3%, ble cyllidebwyd ar gyfer cynnydd o 6%. Tynnwyd sylw bod estyniad ar gyllideb y Gronfa Ffyniant Gyffredin hyd ddiwedd Mawrth 2025 wedi galluogi ariannu tri swyddog o fewn y pennawd UKSPF yn hytrach na'r gyllideb graidd fel a gyllidebwyd.
- **Gwariant Gweithwyr** – Nodwyd bod rhan o'r tanwariant o fewn y pennawd hwn wedi cael ei ddefnyddio i ariannu staff ymgynghorol dros dro tra bod gwaith yn mynd rhagddo i benodi Rheolwr Rhaglen wedi i'r swydd ddod yn wag.
- **Gwasanaethau Cefnogol gan y Corff Atebol** – Cyfeiriwyd bod tanwariant o £41,730 yma sy'n deillio yn bennaf o danwariant ar gymorth y Gwasanaeth Cyllid.
- **Cyd-bwyllgor** - Adroddwyd bod tanwariant o £48,935 yn y pennawd hwn, gyda tanwariant i weld ar bob llinell berthnasol o'r gyllideb o fewn y pennawd.
- **Prosiectau** – Esboniwyd bod tanwariant net o £65,034 ar y pennawd hwn yn sgil cyfalafu costau a ystyriwyd yn flaenorol o fewn llinell gyllideb 'Datblygu Achosion Busnes Prosiect'. Er hyn, cydnabuwyd bod galw uchel am gymorth cyfreithiol allanol ar nifer o brosiectau wedi arwain at orwariant o fewn y llinell 'Datblygu Achosion Busnes Prosiect'.
- **Grantiau** - Nodwyd bod gorwariant i'w weld ym mhrosiectau Ynni Ardal Leol a'r Gronfa Ffyniant Gyffredin. Ymhelaethwyd bod estyniad ar y ddau brosiect hyd at ddiwedd Mawrth 2025 wedi arwain at orwariant net o £96,820. Eglurwyd bod y gorwariant sydd ynghlwm a'r prosiect Ynni Ardal Leol yn cael ei ariannu gan yr arian sydd yn weddill yn y grant. Ymhelaethwyd bod y tanwariant sydd i'w weld yn rhai o gynlluniau sydd ynghlwm â'r Gronfa Ffyniant Gyffredin yn cael eu defnyddio i ariannu'r gorwariant ar gostau gweithwyr y Gronfa yn ogystal â chyfrannu tuag at gostau gorbenion Swyddfa Rheoli Portffolio.
- **Trosglwyddiadau i Gronfeydd Wrth Gefn** – Nodwyd gwariant heb ei gyllidebu o £2.8miliwn o fewn y maes hwn. Eglurwyd bod Bwrdd Uchelgais Economaidd Gogledd Cymru wedi cymeradwyo'r defnydd o'r llog a gronnwyd ar Falansau'r Cynllun Twf yn 2024/25 i ariannu rolau ychwanegol yn unol â gofynion y llywodraethau yn ogystal â chostau datblygu prosiectau o 2025/26 ac i gadw adnoddau cyfredol y Swyddfa Rheoli Portffolio am ddwy flynedd ychwanegol y tu hwnt i Fawrth 2026. Tynnwyd sylw bod y pennawd hwn yn cadarnhau bod y llog a dderbyniwyd ar falensau yn ystod 2024/25 yn cael ei drosglwyddo i Gronfa Adnoddau penodol er mwyn ariannu'r costau hyn.

Rhestrwyd y prif ffrydiau incwm ar gyfer 2024/25 sef cyfraniadau partneriaid, dyraniad refeniw grant Cynllun Twf Gogledd Cymru, cyfraniad gan y Cyd-bwyllgor Corfforedig ar gyfer secondiad staff, grant ynni Llywodraeth Cymru, Cronfa Ffyniant Gyffredin y DU a'r gronfa wrth gefn wedi'i glustnodi.

Eglurwyd bod £1.1miliwn wedi cael ei gyllidebu i'w dynnu i lawr o Grant Cynllun Twf Gogledd Cymru ar gyfer costau refeniw, sef y 2.15% mae'r llywodraethau wedi cytuno y gall cael ei ddefnyddio. Fodd bynnag, er mwyn gadael sefyllfa niwtral am y flwyddyn,

argymhellwyd tynnu £714,000 o'r Grant Cynllun Twf yn hytrach na'r £1.1miliwn a gyllidebwyd.

Adroddwyd bod £211,000 yn y Gronfa wrth Gefn ar 31 Mawrth 2025 gan atgoffa'r Aelodau bod Bwrdd Uchelgais Economaidd Gogledd Cymru wedi cymeradwyo defnyddio £61,000 o'r gronfa hon fel rhan o gyllideb 2025/26, yn ystod ei gyfarfod ar 14 Chwefror eleni.

Tynnwyd sylw bod cyfanswm o £29,000 yn y Gronfa Prosiectau ar ddiwedd Mawrth 2025 ac bod swyddogion wedi derbyn cymeradwyaeth y bwrdd i ddefnyddio'r gronfa hon i ariannu costau prosiect Ynni Lleol ('Datblygu Achos Busnes Prosiect'). Cadarnhawyd bod y costau hyn wedi'u cyfalafu ond bod y costau hyn wedi'u talu o'r Gronfa Prosiectau wrth gefn gan nad yw'r Achos Busnes Llawn wedi cael ei gymeradwyo ar hyn o bryd.

Cadarnhawyd mai balans y Gronfa Llog ar 31 Mawrth 2025 oedd £4.7miliwn. Ymhellach, cadarnhawyd bod £2.8miliwn yn y Gronfa Adnoddau ar ddiwedd y flwyddyn ariannol yn dilyn trosglwyddo'r llog a dderbyniwyd ar y Grant Cynllun Twf yn ystod y flwyddyn.

Cyfeiriwyd at adolygiad diwedd blwyddyn y rhaglen Gyfalaf 2024/25 gan gadarnhau bod gostyngiad net o £13.3miliwn yn y gwariant oherwydd llithriad ar bedwar prosiect. Manylwyd mai'r prosiectau hyn yw'r Canolfan Prosesu Signal Digidol, Ynni Lleol Blaengar, Porth Caergybi a Safle cyn-Ysbyty Gogledd Cymru. Nodwyd hefyd bod diddymu prosiect Canolfan Anaerobig Glannau Dyfrdwy hefyd wedi cyfrannu at y gostyngiad hwn. Cadarnhawyd bod gwaith ar brosiectau Canolfan Biotechnoleg Amgylcheddol, Canolfan Opteg a Pheirianeg Menter a'r Rhwydwaith Talent Twristiaeth wedi gwthio cyfran o'u gwariant proffil ymlaen.

Mewn ymateb i ymholiad ar gymharu'r ystadegau a gyflwynwyd yn yr adroddiad gyda'r blynyddoedd diwethaf, cadarnhaodd y Swyddog Cyllid Statudol bod adrodd ar faterion refeniw yn digwydd ar sail blwyddyn ariannol. Fodd bynnag, cadarnhawyd bydd modd i swyddogion gymharu sefyllfa ariannol gyda'r blynyddoedd diwethaf er cymhariaeth wrth gyflwyno datganiadau o gyfrifon draft i'r Cyd-bwyllgor Corfforedig. Tynnwyd sylw bod materion cyfalaf eisoes yn dangos cymariaethau dros ystod eang o flynyddoedd.

## **7. CYNLLUN TWF GOGLEDD CYMRU – ADRODDIAD PERFFORMIAD A RISG CHWARTER 4**

Cyflwynwyd yr adroddiad gan y Pennaeth Gweithrediadau.

### **PENDERFYNWYD**

- 1. Nodi Adroddiad Perfformiad Chwarter 4 a Chofrestr Risg y Portffolio wedi'i diweddarau.**
- 2. Cymeradwyo cyflwyno Adroddiad Perfformiad Chwarter 4 i Lywodraeth Cymru a Llywodraeth y DU, ynghyd â phwyllgorau craffu'r awdurdodau lleol.**

### **RHESYMAU DROS Y PENDERFYNIAD**

I gyflwyno adroddiad Chwarter 4 (Ionawr i Mawrth) y Cynllun Twf a Chofrestr Risg y Portffolio wedi'i diweddarau.

Mae adrodd chwarterol ar gynnydd yn erbyn Cynllun Twf Gogledd Cymru yn un o ofynion Cytundeb Terfynol y Cynllun Twf. Yn dilyn ystyriaeth gan yr Is-bwyllgor, caiff yr adroddiadau

eu rhannu gyda Llywodraeth Cymru, Llywodraeth y DU a phwyllgorau craffu'r awdurdodau lleol.

## **TRAFODAETH**

Adroddwyd ar nifer o uchafbwyntiau datblygiadol y Cynllun Twf megis cymeradwyaeth i Achos Busnes Amlinellol y prosiect Anturiaethau Cyfrifol, cymeradwyo Achosion Busnes Llawn prosiectau Cydnerth a Pharc Bryn Cegin a hefyd cyflwyno achos dros newid ar brosiect Glynllifon. Ymhelaethwyd bod gwaith adnewyddu ar safle Henfaes yn cael ei gyflawni ar amser ar gyfer Datblygu Canolfan Biotechnoleg Amgylcheddol. Mynegwyd balchder bod Cytundeb Ariannu grant wedi cael ei arwyddo ar gyfer y Rhwydwaith Talent Twristiaeth. Nodwyd hefyd bod y prosiect Cronfa Ffyniant Gyffredin (SPF) bellach wedi ei gau gan edrych yn ôl ar nifer o lwyddiannau megis lansiad y portal sgiliau, prynu offer arolwg symudol a darparu grantiau i 16 o sefydliadau bach cymunedol.

Tynnwyd sylw bod amryw o brosiectau yn adrodd yn goch ar Gofrestr Risg y Portffolio ar hyn o bryd, sef Cysylltu'r Ychydig % Olaf, Ffibr Llawn, NEW H2, Trawsfynydd, Porth Caergybi a Stiwdio Kinmel.

Eglurwyd bod nifer o brosiectau yn weithredol erbyn hyn, gan nodi bod modd adrodd ar rai o'r manteision sy'n deillio ohonynt. Manylwyd bod £15.32miliwn o fuddsoddiad wedi cael ei wneud o fewn y Cynllun Twf yn ystod y flwyddyn ddiwethaf, gyda'r cyfanswm o fuddsoddiadau yn £16.61miliwn. Cydnabuwyd fod y niferoedd hyn yn is na'r targedau ond pwysleisiwyd bod y sefyllfa wedi gwella'n sylweddol ers y flwyddyn blaenorol, gan fod mwy o brosiectau wedi derbyn cymeradwyaeth.

Ymhelaethwyd bod y prosiectau a gymeradwywyd wedi sicrhau £4.712miliwn o refeniw yn ogystal â bod wedi creu 35 o swyddi hyd yma. Ymhelaethwyd bod 261 o unigolion yn derbyn Hyfforddiant a chwblhau cyrsiau er mwyn ennill cymwysterau.

Sicrhawyd bydd modd adrodd ar y math hwn o ddata yn rheolaidd wrth ystyried diweddariadau chwarterol, er mwyn adolygu'r effaith ehangach mae'r Cynllun Twf yn ei gael ar y rhanbarth.

Diolchwyd i'r swyddogion am eu gwaith er mwyn sicrhau gwireddu'r agweddau hyn o'r Cynllun Twf.

Mynegwyd pryder gan Lywodraeth Cymru ar gyflymder gwireddu'r Cynllun Twf gan fod oddeutu 10 mlynedd yn weddill ar y Cynllun a bod angen cynyddu ystadegau buddsoddi yn sylweddol er mwyn cyrraedd targedau'r Cynllun. Fodd bynnag, mynegwyd balchder bod cynnwyd wedi bod ar brosiectau'r Cynllun dros y flwyddyn ddiwethaf. Mewn ymateb, pwysleisiwyd gan Brif Weithredwr dros dro Cyd-bwyllgor Corfforedig y Gogledd ei fod yn hanfodol bwysig bod swyddogion Llywodraeth Cymru a Llywodraeth y DU yn cydweithio gyda'r Cyd-bwyllgor Corfforedig i ddarparu cefnogaeth i sicrhau bod targedau'r Cynllun yn cael eu gwireddu er lles economi'r Rhanbarth.

## **8. CAU ALLAN Y WASG A'R CYHOEDD**

### **PENDERFYNWYD**

**PENDERFYNWYD** cau allan y wasg a'r cyhoedd o'r cyfarfod yn ystod y drafodaeth ar Eitem 9-11 gan ei bod yn debygol y datgelir gwybodaeth eithriedig fel y'i diffinnir ym Mharagraff 14 o Atodiad 12A o Ddeddf Llywodraeth Leol 1972 - Gwybodaeth ynglŷn â thrafodion ariannol neu fusnes unrhyw berson penodol (yn cynnwys yr awdurdod sydd yn dal y wybodaeth hynny).

Mae budd cyhoeddus cydnabyddedig mewn bod yn agored ynglŷn â defnydd adnoddau cyhoeddus a materion ariannol cysylltiedig. Cydnabyddir fodd bynnag fod adegau, er gwarchod buddiannau ariannol a masnachol cyhoeddus fod angen trafod gwybodaeth o'r fath heb ei gyhoeddi. Mae'r adroddiad yn benodol ynglŷn â materion ariannol a busnes ynghyd a thrafodaethau cysylltiedig. Byddai cyhoeddi gwybodaeth fasnachol sensitif o'r math yma yn gallu bod yn niweidiol i fuddiannau'r cyrff a'r Cynghorau ac yn tanseilio hyder rhai eraill sydd yn ymwneud a'r Gytundeb Twf i rannu gwybodaeth sensitif ar gyfer ystyriaeth. Byddai hyn yn groes i'r budd cyhoeddus ehangach o sicrhau'r allbwn cyfansawdd gorau.

## **9. ANTURIAETHAU CYFRIFOL – DIWEDDARIAD AR Y GOFYNION**

Cyflwynwyd yr adroddiad gan swyddogion Zip World a QUAD Consultancy.

### **PENDERFYNWYD**

- 1. Nodi'r cynnydd a wnaed gan Zip World tuag at fynd i'r afael â'r argymhellion a bwriad y cwmni i gyflwyno cais am newid i ddileu elfennau e-fws y prosiect.**
- 2. Gwahodd Zip World i gyflwyno ei gais am newid i'r cyfarfod nesaf ac i roi diweddariad pellach ar y cynllun ymgysylltu a'r Cynllun Buddion Lleol fel rhan o'r adroddiad hwn.**

### **RHESYMAU DROS Y PENDERFYNIAD**

Darparu diweddariad yn erbyn y tri gofyn a osodwyd gan y Bwrdd Uchelgais Economaidd wrth gymeradwyo Achos Busnes Amlinellol y prosiect.

### **TRAFODAETH**

Trafodwyd yr Adroddiad.

## **10. ARGYMHELLION RHESTR WRTH GEFN Y CYNLLUN TWF**

Cyflwynwyd yr adroddiad gan y Pennaeth Gweithrediadau a Phrif Weithredwr dros dro Cyd-bwyllgor Corfforedig y Gogledd.

### **PENDERFYNWYD**

- 1. Cytuno ar yr argymhellion sy'n deillio o ganlyniadau asesiad Mynegi Diddordeb (EOI) gan wahodd y prosiectau hynny i ymuno â Rhestr Wrth Gefn y Cynllun Twf.**
- 2. Cytuno ar y broses arfaethedig ar gyfer rheoli prosiectau'r rhestr wrth gefn.**
- 3. Cytuno ar y broses sicrwydd a chymeradwyaeth symlach arfaethedig ac yn dirprwyo i'r Cyfarwyddwr Portffolio wneud unrhyw ddiwygiadau angenrheidiol i sicrhau cymeradwyaeth Llywodraeth Cymru a Llywodraeth y DU, mewn ymgynghoriaeth gyda'r Cadeirydd a'r Is-gadeirydd.**
- 4. Bod:**
  - a. Yr is-bwyllgor cytuno i gychwyn proses i asesu ac adolygu'r cwmpas a'r achos dros ymestyn y cynllun twf presennol i gynnwys prosiectau trafnidiaeth.**

- b. Yr Is-bwyllgor yn comisiynu'r Cyfarwyddwr Portffolio i baratoi adroddiad opsiynau manwl mewn ymgynghoriad â Llywodraeth Cymru a'r DU a swyddogion y Cynghorau Cyfansoddiadol a Phartneriaid Addysg.
- c. Yr adroddiad opsiynau yn cael ei gyflwyno i'r Is-bwyllgor gyda'r bwriad o benderfynu a ddylid cychwyn proses newid yn ffurfiol i sicrhau cytundeb ar gyfer Cynllun Twf estynedig i gynnwys prosiectau Trafnidiaeth.

## **RHESYMAU DROS Y PENDERFYNIAD**

Mae'r penderfyniad a geisir yn ymateb i'r cais a wnaed gan yr Is-bwyllgor Lles Economaidd ym mis Ebrill 2025 i ddechrau'r broses Mynegi Diddordeb (EOI) a chyflwyno argymhellion yn yr Is-bwyllgor hwn yn unol â'r amserlen y cytunwyd arni.

## **TRAFODAETH**

Trafodwyd yr Adroddiad.

### **11. CRONFA YNNI GLÂN (YNNI LLEOL BLAENGAR) – ACHOS BUSNES LLAWN**

Cyflwynwyd yr adroddiad gan y Pennaeth Gweithrediadau a Rheolwr Prosiect Ynni a Sero Net.

## **PENDERFYNWYD**

1. Cymeradwyo'r Achos Busnes Llawn ar gyfer y Gronfa Ynni Glân, Cynllun Rheoli Cronfa gan gynnwys Strategaethau Buddsoddi a'r Matrics Penderfyniadau Dirprwyedig ar gyfer y prosiect.
2. Cymeradwyo y Matrics Penderfyniadau Dirprwyedig ar gyfer y prosiect.
3. Dirprwyo i'r Cyfarwyddwr Portffolio, mewn ymgynghoriad â'r Cadeirydd, yr Is-gadeirydd, y Swyddog Adran 151 a'r Swyddog Monitro i gadarnhau cwblhau'r materion sydd heb eu nodi yn adran 7 a chytuno ar lansiad ffurfiol y Gronfa.
4. Bod yr Is-bwyllgor Lles Economaidd yn penodi'r Cyfarwyddwr Portffolio i fod yn swyddog atebol am gyflawni'r prosiect.
5. Cymeradwyo bod cyfalaf a ad-dalwyd yn ystod gweithrediad y gronfa yn cael ei neilltuo i'r Is-gronfa Wrth Gefn gael ei ail-fuddsoddi yn unol â'r strategaethau Buddsoddi. Cymeradwyo bod refeniw dros ben a gynhyrchir gan y prosiect unwaith y bydd costau gweithredu wedi'u talu yn cael ei neilltuo i ariannu gweithrediad y Swyddfa Rheoli Portffolio.
6. Gofyn am ddiweddariad pellach ymhen 6 mis er mwyn adolygu partneriaethau perthnasol.

## **RHESYMAU DROS Y PENDERFYNIAD**

I geisio cymeradwyaeth yr Is-bwyllgor o'r achos busnes llawn ar gyfer Prosiect y Gronfa Ynni Glân.

## **TRAFODAETH**

Trafodwyd yr Adroddiad.

Dechreuodd y cyfarfod am 09:30 a daeth i ben am 12:05.

---

Cadeirydd